

四庫全書

史部

欽定四庫全書

隆平集卷十五

宋 曾鞏 撰

儒學行義

尹洙字師魯河南人天聖二年登進士第積官至右司
諫進起居舍人直龍圖閣知潞州貶崇信軍節度副使
徙監均州酒稅卒年四十七子朴構兄源字子漸亦以
文學知名終太常博士洙博學有識度遇事無難易勇

於敢為人有疑難不能自決者造問焉洙為指畫講說
皆釋然而去通六經尤深於春秋自五代之弊氣格不
振宋興柳開始為古文而辭語猶事隱奧至天聖初洙
與穆修始興起之繼而作者遂高出近世矣有文集二
十七卷初洙集賢院上疏曰漢文帝盛德之主賈誼論
當時事勢猶云可為慟哭孝武帝外制四夷以強主威
徐樂嚴安亦以陳勝亡秦六卿篡晉為戒二帝不惡危
亂滅亡之語故子孫保有天下者十餘世秦二世時闕

東盜起或以反者聞二世怒下吏或曰逐捕令盡不足
憂乃悅隋煬帝時四方兵興左右近臣皆隱賊數不以
實聞或言賊多者輒被詰二帝以免亂滅亡為諱故秦
隋之宗社數年而為丘墟矣陛下視今日天下之治孰
與漢文威制四夷孰與漢武國家基本仁德陛下慈孝
愛民誠萬萬於秦隋至於西有不臣之寇北有強大之
鄰非特間巷盜賊之勢也自西夏叛命四年並塞苦數擾
內地疲遠輸兵久於外而休息無期卒有乘弊而起兵

法所謂雖有智者不能善其後當此之時陛下當夙夜
憂懼所以慮事變而塞禍源也陛下延訪邊事容納直
言前世人主勤勞寬大未有能遠過者然未聞以宗廟
為憂危亡為懼此臣所以感憤於邑而不已也何者今
命令數更恩寵過濫賜予不節惟此三者戒之慎之在陛
下所行耳非有難動之勢也而因循不革弊壞日甚臣
是以謂陛下未以宗廟為憂危亡為懼者此也夫命令
者人君所以垂信於下異時民聞朝廷降一命令皆竦

觀之今則不然相與竊語以為不久當更既而信然此命
今日輕於下也命令輕則朝廷不尊矣又聞羣臣有獻
忠謀者陛下始甚聽焉後復一人沮之則意移矣忠言
者以信之不能終頗自詘其謀以為無益此命令數更
之弊也夫爵賞者陛下所持之柄也近時外戚內臣以
及士人或因緣以求恩澤從中而降謂之內降臣聞唐
氏哀政或母后專制或妃主擅朝樹恩私黨名為斜封
今陛下戚柄自出外戚內臣賢而才者當與大臣公議

而進之何必襲斜封之弊哉使大臣從之則壞陛下綱紀不從則沮陛下德音壞綱紀忠臣所不忍為沮德音則威柄輕於上且盡公不私朝廷所以責大臣今乃自以私暱撓之而欲責大臣之不私難矣此恩寵過濫之弊也夫賜予者國家所以勸功也比年以來嬪御及伶官太醫之屬賜予過厚民間傳言內帑金帛皆祖宗累朝所積陛下用之不甚愛惜今之所存無幾疎遠之人誠不能知內府豐匱之數但見取於民者日滋即知

畜於公者不厚臣亦知國家自西方宿兵用度寔廣帑
藏之積未必悉為賜予所費然下民不可家至而戶曉獨見
陛下行事感動爾往歲聞邊將王珪以力戰獲名馬金帛
之賞則無不悅服或見優人所得之過則往往憤歎人情
不可不察此賜予不節之弊也臣所論三事人皆共知
近臣從諛而不言以至今日方今非獨夷狄之為患朝
政日弊而陛下不寤人心日危而陛下不知故臣願先
正於內以正於外然後忠謀漸進綱紀漸舉國用漸足

士心漸奮邊境之患非所患也惟深察秦隋惡聞忠言所以亡遠法漢帝不諱危亂所以存日新盛德與民更始則天下幸甚上嘉納之任福之敗當時言者謂隨軍耿傳督戰太急後得傳書乃戒福持重洙以傳文吏無軍責而死行陣被誣作憫忠辨誣二篇初劉平等戰歿朝廷以夏竦為安撫經略使范仲淹韓琦副之更以洙為判官詔議攻守計乃具二策令琦與洙詣闕奏之上命用及策遂趨延州謀出兵而仲淹持不可還至慶

州會任福已敗於好水川洙因發慶州部將銳卒數千
赴援而賊已引去夏竦奏洙擅發兵降通判濠州及知
渭州鄭戩為陝西四路都總管遣劉滬董士廉城水洛
洙奏罷之時鄭戩已解四路而奏滬等督役如故洙屢
召滬等不至遣人代之亦拒命洙乃諭狄青械以下吏
戩論奏不已徙洙慶州又徙晉州卒城水洛滬等違洙
命猶奪官乃知潞州士廉詣闕訟之命御史劉湜就鞠
無罪乃以假公用錢與部將孫用又以為嘗自貸遂及

貶斥天下莫不以為湜文致之也久之上賞其無罪特
賜一子官

江休復字鄰幾雍丘人天聖二年登進士第又舉書判
拔萃中選因獻所著書特除集賢校理赴進奏院祠神
會落職久之復舊擢修起居注積官刑部郎中卒年五
十六休復外簡曠而內行甚飭事孀姑如母強學博覽
為文典雅尤工於詩喜琴奕飲酒不慕聲利著唐鑒十
五卷春秋世論三十卷文集三十卷又作神告一篇言

皇嗣事以感悟上意又常言昭憲太后家子孫多流落
民間者因得盡加收錄子懋簡懋相懋迪

周堯卿字子餘初名夔今名及字夢人授之也其先汝
陰人五世祖曜文唐道州刺史乾寧中劉建峯將馬霸
圖割據湖外仕者留不敢去子孫因家焉既又徙居荆
州之南堯卿警悟強記七歲善賦詩弱冠以學行知名
天聖二年登進士第積官至太常博士通判饒州卒年
五十三子諭說諡諷說諱誼有文集二十卷詩春秋說

各三十卷堯卿十二喪父憂戚如成人見母氏則抑情
思哀不欲傷其意母異之謂族人曰是兒愛我如此多
知孝養我矣卒能孝養志如母之言其於昆弟尤篤友
愛執母喪倚廬三年席薪枕塊雖疾病不飲酒食肉或
勉之以禮曰禮老病不止酒肉意或不勝喪耳病且未
老思及此耶葬之先期躬自負土有告之曰古之貧無
以葬者或然今子何自苦泣然流涕曰過是雖欲竭力
復可得乎既葬慈烏百數銜土集壠上人莫不駭矚以

為孝感所致堯卿為人簡重不校有慢已者必厚為禮
以媿之居官祿雖薄賙宗族朋友罄而後已所至稱治
民有去思嘗知汀州寧化縣提點刑獄楊紘入境微伺
刺史善否有被刑而耘苗者紘就詢其故對曰貧以利
故為人直其枉令不可欺而我欺之我又何怨紘至邑
不復他察第以所聞薦之慶厯間范仲淹舉經行可為
師表未及用而卒堯卿之學不惑傳註問辨思索以通
為期其學詩以孔子所謂詩三百一言以蔽之曰思無

邪孟子所謂說詩者以意逆志是謂得之考經指歸而見毛鄭之得失曰毛之傳欲簡或寡於義理非一言以蔽之者也箋欲詳或遠於情性非以意逆志者也是可以無去取乎其學春秋曰左氏記之詳得經之所以書者至三代之異同均有所不取曰聖人之意豈二致邪讀莊周孟軻氏之書曰周善言理未至於窮理窮理則好惡不謬於聖人孟軻是已孟善言性未至於盡已之性能盡已之性則能盡物之性而與天地參其惟聖人

乎天何言哉性與天道子貢所以不可得而聞也昔宰
我子貢善為說辭冉牛閔子顏淵善言德行孔子曰我
於辭命則不能也惟不言故曰不能而已蓋言生於不
足者也其講解議論類皆若是或有以堯卿居喪比馮
元者孫復聞之曰元動息求之於禮其哀思未數數能也
堯卿先盡其哀而情不遠於禮其可同日語哉故歐陽
修以文表其墓曰若周君者事生盡孝居喪盡哀而以
禮者也禮之失久矣喪禮尤廢也孔子在魯而魯人不

能行三年之喪其弟子疑以為問則非魯而他國可知也孔子歿其後世又可知也又曰君學長於毛鄭詩左氏春秋修之辭其略見於此

孫復字明復晉州人少舉進士不中第退居泰山學春秋著尊王發微自石介而下皆師事之年四十未娶李迪以其弟之子妻之慶厯中范仲淹富弼言復有經術宜在朝廷除校書郎國子監直講駕幸大學面賜五品服嘗賜對邇英閣說詩上欲以為侍講而楊安國言其

講說多異先儒遂寢累遷至殿中丞卒年六十六賜其家錢十萬復治春秋不取傳註其言簡而易詳明諸侯大夫功罪以考時之盛衰而推見治亂之迹故得經之意為多既病樞密使韓琦始言於上選吏給紙筆命其門人祖無擇即其家得書十有五篇錄藏祕閣而特官其子慶厯七年索徐州狂人孔直溫家嘗有遺復詩稿坐貶久之翰林學士趙鼎等十餘人言復經為人師始還舊職終不獲遷也

石延年字曼卿幽州人其祖始舉族自契丹來卜居南
京之宋城延年應進士累舉不中第賜三班奉職耻不
就張知白素奇之謂曰母老且擇祿耶延年不得已而就
後以右班殿直換太常寺太祝知濟州金鄉縣有治效
用薦授通判永寧軍徙永靜軍除館閣校勘寶元二年
遷秘閣校理積官太子中允卒年四十八天章閣待制
吳遵路常與延年同使河東料揀民兵及卒遵路為言
朝廷特賜其子濟太廟齋郎延年寶元間嘗上書言天

下不識戰鬪三十餘年請為二邊備不報及元昊反上
思其言故命使河東凡得兵數十萬還賜五品服時邊
將遂欲以鄉兵捍賊延年笑曰此得吾粗也夫不教之
兵勇怯相雜若怯者見敵而動則勇者亦牽而潰矣今
雖未暇教募其敢行者則人人皆勝兵也又嘗請募人
說唘厮羅及回鶻舉兵攻元昊上亦嘉納之延年喜劇
飲頗自放若世務不能撓者然與人論天下事是非曲
當善書工於詩有集行於世

張唐卿字希元青州人有辭學履行景祐元年登進士
甲科通判陝州民母再適人而死及葬其子盜以歸與
父同葬有司請論如法唐卿權郡事曰是知有孝不知
有法耳釋之而聞於上聞者莫不嘉之以父憂毀瘠嘔血
而卒年二十八無子

石介字守道兗州人先世農家父丙始仕至太常博士
介天聖八年登進士第久之為國子監直講以杜衍薦
改太子中允韓琦除直集賢院出通判濮州卒年四十

一初介自嘉州軍事判官丁父母憂躬耕徂徠山葬五世之未葬者七十喪魯人謂之徂徠先生介篤學氣節勁正嘗謂時無不可為不在其位則行其言言見用利天下不必出諸已言不用獲禍至死而不悔故其文章陳古今治亂成敗以指切當世無所諱忌在太學教諸生聞朝廷美政則歌誦之否則刺譏之宰相呂夷簡以疾罷而杜衍代夏竦樞密使范仲淹富弼韓琦樞密副使歐陽修余靖蔡襄為諫官介曰此盛事也歌誦吾職

其可已乎乃作慶厯四德詩分別邪正專斥夏竦泰山
孫復謂之曰子禍始於此矣其後徐州孔直溫有逆謀
搜其家得介書而或謂介詐死投契丹矣夏竦請發其
棺驗視又有請羈管其子弟久之始釋歐陽修作詩以
悼之

胡瑗字翼之泰州人累舉進士不中景祐中求知音者
白衣召至京師與李照阮逸定樂除秘書郎范仲淹帥
延州辟丹州推官自湖州掌學入為諸王宮教授以疾

致仕嘉祐初為太子中允天章閣侍讀復以疾授太常
博士致仕卒年六十七子元康朝廷再起瑗以議大樂
樂成多變古法其樂制以一黍之廣為分以制尺其律
經三分四釐六毫四絲其圍十分三釐九毫二絲其聲
比舊樂下半律又鐘磬大小一以黃鍾為率而鐘之狀
類鐸既而議者多非之後率不用瑗通經術教人有法
在湖州門生去來常數百人慶厯中興太學有司請下
湖州取其規矩為太學法皇祐中起議樂因除國子監

直講而從其學者益衆成材而備朝廷器使蓋不可勝計

劉頴字子望徐州人大中祥符元年登進士第初知汝州龍興縣坐殺已就執之盜免官遂居鄉里以著書自適從學者常數十百人名聞東州乃採摭兩漢至五代名臣奏對有補于時者為輔弼名對四十卷馮元及錢易滕涉蔡齊為上之且言頴經行淳備乃以補任城縣主簿李迪知兗青二州皆辟為從事卒年五十一子庠

所著有儒術通要經濟樞言石介見其文歎曰恨不得
在弟子之列

王回字深甫福州侯官人嘗舉進士中第補衛真縣主
簿議邑事不合移疾自免久之大臣薦之朝廷授以一
邑命下而卒年四十二有集二十卷弟向亦以文學知
名善序事亦早卒回孝友質直博學知要與臨川王安
石友善安石謂回造次必稽孔子孟軻所為而不為小
廉曲謹以求名於世其學問所得自漢以來列儒林者

罕及也

劉義叟字仲叟澤州人舉進士不中第歐陽修使河東
薦其學術擢試大理評事留為唐書律厯天文五行志
編修官書成授崇文院檢討未謝卒義叟通經史百家
之學國朝典故財賦刑名兵械鍾律皆所究知星厯數
術尤得其要嘗以春秋洪範變異休咎著書十數篇斥
古人所強合者其占日月星辰無或不驗皇祐五年日
蝕心是時朝廷制樂鐘聲太鬱而不發又陝西錢法大

弊義叟曰此所謂害金再興與周景王同占也上將感
心腹之疾乎其後月入太微曰宮中當有喪而張貴妃
薨至和初四月日蝕客星出於昴曰契丹主且死矣其
言無差所著有十三代史志劉氏輯歷春秋災異南北
史韻目

徐復字復之建州人常遊京師舉進士不中第退而學
易通流行卦氣之法自筮無祿故不復進取遊淮浙間
數年凡天文地理遁甲占射諸家之說讀之必得其旨

因聽其鄉人林鴻範說詩之所以用於樂者忽若有得
遂舉器求樂之本而曉然知律呂微妙動作之制時胡
瑗作鐘磬大變古法復笈曰聖人寓器以聲今不先求
其聲而更其器是可用耶卒如其言慶厯初范仲淹過
潤州問復以衍卦占之今夷狄無動乎復為占西邊用
兵日月無少差其後與郭京同被召賜對問以天時人
事復據京房易卦推今年所配年月日時當小過剛失
位而不中宜在彊君德仁宗又問明年主何卦復對曰

乾卦用事說至九五而止又問前年京師黑風其咎安在對曰其兆在內應豫王之喪乎明日特除大理評事復固辭乃賜號冲晦處士授其子發校書郎復履尚高潔徙居杭州十餘年卒年八十京好言兵范仲淹滕宗諒數薦之故與復同名焉

高懌字文悅高祖李興唐末徙荆南之地子孫因家焉懌少孤養於民十三歲能屬文通經史聞种放隱終南山懌亦築室豹林谷放見而奇之與張堯許勃號南山

三友詔舉沉淪草澤冠準薦不起景祐中朝廷錄國初
侯王後憚推其弟忻得一官范雍京兆建學召憚授諸
生經從之者數百人康定中杜衍請賜以處士號上特除
大理評事固辭上嘉其守改賜安素處士文彥博又薦
其經行先嘗賜良田五頃矣至是復賜第一區既又除
光祿寺丞懇辭不拜卒年七十一子嗣復有少微諸宮
集續東臯子兵源掛冠錄烟霞志凡數十卷憚喜讀書
為文有法而詩清淡有古風論唐以來至宋衣冠氏族

人物皆見其本末考之載籍不謬嘗夢白衣持素書目
為白鹿洞主因作詩識之二十年晝寢復夢之其夕卒
葬白鹿鄉

林逋字君復杭州人祖克已為錢氏通儒院學士逋少
孤嗜學景德中遊江淮歸結廬杭州之孤山真宗聞其
名屢賜束帛命州縣歲時問勞居西湖二十年不入城
市卒年六十一臨終有詩云湖上青山對結廬亭前修
竹亦蕭疎茂陵他日求遺草猶喜曾無封禪書逋不娶

無子教其兄之子宥登進士第逋少常遊臨江軍李諮始舉進士未有知者逋謂人曰此公輔之器也逋之卒諮時知杭州為制總麻服與其門人哭而葬之刻臨終一絕納壙中既而仁宗賜諡曰和靖先生仍賜其家帛五十疋米五十石逋善行書喜為詩其語孤峭清淡其稿未嘗自錄或曰何不錄以傳後世乎逋笑曰吾猶不欲以詩取名于林泉况後世耶

代淵字仲顏永康軍人天聖二年登進士第累遷至太

常丞知益州田況表其所著周易旨要二十卷朝廷特授祠部員外郎而平淵恬於勢利退居青城山二十餘年以著書自適仕進非所樂也慶厯初知制誥王拱辰安撫西川遺書欲起之托疾不往見

趙師旦字潛叔單州武城人以叔稹蔭補累官至右贊善大夫知康州

曹覲建州人故贈諫議大夫修古之姪修古無子以覲為嗣而蔭以官累遷至太子中舍知封州

孔宗旦兗州人為邕州司戶叅軍儂智高潛聚衆溪峒時州有白氣起庭中江水溢宗旦以為兵象度智高必反以書告知州陳拱不聽皇祐四年遂舉兵寇邕橫貴龔封滕梧康端等州賊之未至曹覲以州無兵備遂募敢死士五百人以守城而鄰城已為避賊計遂給以書曰賊止期得邕貴而已豈肯離巢穴遠來耶慎勿張皇驚擾也覲以為然乃縱所募去而賊至又勸使之走覲叱之曰先諫議以忠義自持吾豈苟生而貽辱先人者耶

俾妻子逃匿民間自佩郡印與兵馬監押陳睭率州兵
百餘人禦賊力不勝遂為賊所執同郡胥及二卒命人
錮守之胥欲與俱亡不可遂授二卒印使懷去不食三
日賊諭欲用之覲叱曰大彘敢爾耶遂遇害投屍水中
趙師旦亦嘗先遣人覘賊還報曰諸州長吏皆棄城去
矣師旦曰汝亦欲吾去耶乃索得諜者三人斬以徇而
賊將及城下因語妻子曰畱此俱死無益也付以郡印
令避難山谷間明日賊大至州兵止三百人師旦與兵

馬監押馬貴力戰矢盡還坐堂上智高擁衆入師旦罵
曰朝廷負若耶大兵且至戮汝無遺類智高怒并貴害
之始賊既破橫州宗旦遣其家屬依桂州曰吾有官守
不得去無為俱死也及州破宗旦被執賊有用之之意
宗旦慢罵不已以及於禍宗旦嘗宦京東頗為監司耳
目推辱士人為衆所惡臨難乃能立節如此祖無擇以
其事聞於朝而卹典頗厚趙師旦之妻生子數日而避
賊棄之草中三日猶不死復取而育之曹覲死其妻及

幼子聞而死封康二州民為二守立廟歲時祀之朝廷
贈趙師旦光祿卿賜其母長安縣太君冠帔錄其弟師
陟為大理寺丞子觀右侍禁從子觀試將作監主簿贈
曹觀太常少卿錄其弟現為建安縣主簿四子皆賜官
長者為太常寺奉禮郎終喪年未應格諫官唐介言於
上特命與差遣仍見闕修古妻陳氏陳乞現三注建州
官以便其私慶厯間耿傳叅任福軍事死於好水川其
忠義當先錄於此而與王珪桑懌同列於武臣間蓋欲

見其本末也

隆平集卷十五

欽定四庫全書

隆平集卷十六

宋 曾鞏 撰

武臣

藥元福太原人有勇善射少為軍職在後唐為裨將晉
少帝即位契丹入寇親征次澶淵登陣望敵衆不見其
際元福與慕容鄴各以二百騎奮擊陣前敵遂大潰明
年敵復內侵張彥澤率師遇之陽城糧道隔絕仍乏水

草諸將皆以敵乘順風宜少俟之元福曰俟風回吾屬
為據矣彼謂我不能逆風戰今出其不意兵之詭道也
彥澤從之殺獲甚衆追奔二十餘里以元福為威州刺
史西戎三族攻靈州命元福佐朔方節度使馮暉討之朔
方距威州七百里地無水草謂之旱海攜糧至暉食盡
詰朝行四十里而敵騎數萬扼要路暉大懼遣人致賂
求成雖許及日中猶未決暉曰奈何元福曰彼正欲困
我耳察其勢敵雖衆特依西山而陣者其精兵也請以

驍銳先薄西山彼或少卻當舉黃旗為識合勢擊之暉
善其謀斬馘殆盡漢乾祐中鳳翔王景崇河中李守正
永興趙思綰結蜀兵為援以叛元福從暉進討兵衆寡
數倍他將皆為卻而元福擁數百騎獨出令曰敢回頭
者斬衆効死以戰遂有成功慕容彥超盜據兗海周祖
命曹英為帥向訓副之以元福為行營都虞候謂曰已諭
英訓勿以軍禮見汝及元福至英訓皆父事焉會親征
城遂拔以功除建雄軍節度使世宗討劉崇糧不繼而

班師命元福殿崇出追元福擊走之在周凡改四鎮宋興加檢校太師卒年七十七贈侍中

郭瓊字國華幽州盧龍人少事郭丹遷至都校後唐明宗朝挈族來歸授以團練使晉末中原多故盜賊蠭起德光以瓊為忻州刺史即單車赴治盜畏其威相與遁去漢乾祐中淮人攻密州以瓊帥東路行營淮人聞之亦亟引避劉銖守平盧稱疾不朝隱帝疑其叛詔瓊領兵屯青州銖將害之張宴伏兵幕下瓊無懼色銖亦不

敢發瓊徐為言去就禍福銖遂趨召周顯德中為齊州防禦使歲饑出俸以濟之民多自鄰境至者郡人詣闕以言詔為立碑宋初以左衛上將軍致仕卒瓊推賢接物有士君子之風所至民懷愛之

何繼筠字化龍河南人父福進仕周至節度使五代史有傳福進節制鎮州繼筠補牙職以偏師出玉門斬并人數千級賞功除刺史契丹入寇又擊敗之宋興命護兵關南乾德六年太祖親征太原繼筠奪并人汾河橋

又敗其衆於城下開寶末契丹來為并援繼筠屯石嶺
闕追奔數十里斬馘千餘級遂擢授建武軍節度使屢
以少擊衆在塞上二十年北人畏其名多繪其像而瞻
拜之卒年五十繼筠兒童時嬉戲必分布部伍為戰陣
狀及長善射深沉有謀與士卒同甘苦子承矩字正則
開寶二年從繼筠討劉崇生擒其偽將胡澄四年特除
開廐副使太平興國中監兵泉州以平草寇功遷開廐使
更擢權知河陽徙潭州居六年端拱初除淄州刺史簽書

滄州事時契丹數寇邊承矩請屯兵於順安寨西關易河溝口引水東西三百餘里南北五十七里築隄瀦水以助要害太宗用其策屬霖潦為患議者多攻其失承矩援漢魏至唐故事以折之詔以承矩為河北制置屯田使民遂獲莞蒲魚蛤之利而稻田歲入亦助邊餉自是高陽並海以抵順安絕契丹奔衝之虞又言順安至西山不遠百里亦多川源願因而廣之用息外患朝廷雖嘉之未及行也真宗即位常手疏和戎為息民之利

景德初契丹修好上益善其有謀又命知雄州進本州
團練使兼安撫使時北使初至承矩以為待之禮宜得
中庶可久也上嘉納久之懇求罷徙齊州卒年六十六
贈相州觀察使子龜齡遐齡九齡緣邊及涿易州軍民
聞承矩卒無不流涕相與至雄州發哀供佛何氏世為
名將而承矩好學有文所與遊者必賢士大夫有文集
藏於家平時章疏論事多適用既卒上遣內侍就其家
取存日奏疏進內太宗知其好學喜吟詠前後命中貴

人賜以御製并書積五十餘軸又面付手札以褒之初
除團練使真宗謂宰臣曰承矩將家子知書好名以才
能自任宜授以美名遂除英州及丐罷瓦橋詔自擇代
遂薦李允則亦良將也承矩御下以誠同其甘苦邊民
有告機事必欲款語無所猜忌故敵中動息無不逆知
至道初敵騎萬餘夜逼城堞遲明承矩出戰斬獲甚衆
仍得其酋長敵始引去議者猶以開關不俟命為罪故
徙滄州是夏魏廷式採訪河北得其功狀朝廷遣使實

覆將士始獲推賞承矩治滄雄州三任績效甚著

楊廷璋字溫玉真定人祖洪裕少漁貂裘陂有以二石雁授之者其翼一拊左一拊右曰北嶽使也是年生女為周祖淑妃明年生廷璋以淑妃得賜官遂至節度使常鎮晉州而隰州闕守乃請監軍李謙溥權領州事謙溥至隰并人圍其城或請速救之廷璋曰賊遽至必未攻城乃募死士百數潛遣諭謙溥相應夜銜枚擊之并人大潰逐北數十里宋興荆罕儒監晉州兵疑廷璋周

之近親欲圖之見必懷刃而廷璋接以至誠卒不敢發
周祖常諭廷璋圖涇帥史懿廷璋屏左右示以詔書懿
受代入朝遂免禍時以罕儒之不能加害為若有施報
也廷璋被詔單騎朝覲加檢校太尉

王審琦字仲寶河南人仕周至防禦使沈毅善謀所至
有政績世宗征淮舒州堅壁不下以郭令圖為刺史命
審琦司超將兵攻城一夕拔之令圖入復見逐於郡人
審琦方進軍援黃州聞令圖被逐乃選騎銜枚襲城夜

敗其衆而復納之遂以兵破紫金山世宗圍濠梁審琦
先拔其水寨乃降及攻楚州審琦料淮人城陷必遁設
伏待之卒墮計中宋興從太祖親征李重進論功除忠
武軍節度使在鎮累年寬簡使民屬邑令有以罪黜縣
胥者僚佐以為令不先白是輕主帥也請詰其罪審琦
曰五代以來諸鎮橫暴令宰之職不振久矣能斥黜吏是
可賞也聞者歎服在官歲得租課量入而用未嘗橫斂
卒贈瑯琊郡王子承衍尚昭慶公主

符彥卿字冠侯宛丘人父存審後唐節度使封秦王五代史有傳彥卿初仕莊宗於太原郭從謙之亂左右皆去惟彥卿與王全斌力射殺數十人莊宗遇害慟哭久之天成中大破契丹於喜山至晉領同州節度兄彥饒以滑臺叛上表乞歸田里晉釋不問契丹寇河朔彥卿駐澶淵高行周被圍於鐵丘諸將相顧無敢當其鋒彥卿獨以數百騎奮擊敵遂遁行周獲免開運二年契丹十餘萬衆圍晉師於陽城城中無水人馬多渴死會大

風揚塵彥卿遂與張彥澤皇甫遇謀乘勢決戰敗之戎主乘素駝而遁車帳兵械悉為彥卿所獲及德光入汴召而責之彥卿曰臣事晉主不敢愛死今日惟命德光笑而釋之即遣歸鎮武寧方徐宋間盜賊蠭起彥卿至埭橋遇賊李仁恕擁衆數萬攻徐州彥卿至城下賊控馬首請同入城彥卿之子昭序自城中遣人大呼曰相公助賊何也城不可入賊之計不行相率拜馬前而去漢祖得天下封彥卿魏國公至周封衛王加太傅改魏

王宋興加太師開寶三年引疾納節鉞退居洛下八年
間乘小駟遊佛寺名園人服其曠達性不飲酒謙恭待
士對賓客清談終日不及世務為將有謀善戰所得俸
賜皆分給士卒故人樂為用卒年七十六周世宗皇后
及太宗皇后皆其女也周恭帝及太祖兩朝俱賜詔不
名北兵自陽城之敗畏不敢呼其名馬不飲齧則叱之曰
此豈有符王耶戎主北歸其母問人曰符王安在對曰
鎮彭門曰符王不來何其失策之甚其為契丹所憚如

此

王全斌太原人父在唐為岢嵐軍使私畜武士莊宗疑而召懼不敢行全斌曰上疑有異志矣若以全斌為質則釋矣父如其言全斌因得隸莊宗帳下歷晉漢間積官至節度觀察留後宋興除節度使平蜀民訟其掊克貶留後開寶末復領節制卒年六十九凡貶黜十年怡然自得性輕財故士卒樂為之用曾孫凱字勝之其祖審鈞全斌子也審鈞以擊賊而死其子遂徙居京兆家

富於財凱日散施結客與少年馳獵南山下或踰月不
歸民有訟其踐田苗者收至府寇準守京兆見而奇之
乃言於朝廷以全斌平蜀之功而審鈞復死於忠義當
錄其後遂除凱三班奉職累擢閤門祇候鎮定邢趙都
巡檢使元昊反徙監麟州兵以功遷至節度觀察畱後
馬軍副指揮使卒年六十六贈節度使謚莊恪子緘彭
處仁大方處厚鎮特偉初凱九年在河外數以少擊衆
有功因明鎬論奏乃加進擢

李謙溥字德明太原人少通左氏春秋仕晉為西頭供奉官至周任刺史嘗監晉州兵以偏師屢挫太原而屠城掠地錄功為多隰州闕守晉率楊廷璋請謙溥權領州事至隰濬城隍嚴兵備未旬日而并人至方盛暑謙溥服絺綌搖羽扇引二小吏登城徐步并人望之勒兵不敢動因以敢死士百數夜縋城與廷璋軍銜枚薄賊營破之逐北數十里斬首千餘級建隆初改慈州刺史久之詔與孫建進沈繼深王睿進兵太原略地謙溥為畫

出入進退策衆不能用及班師又謂曰今退兵彼必來
乘我宜整衆為備諸將亦不答而為并人所襲狼狽奔
走獨謙溥兵成列并人遂卻復移隰州刺史築保安平
同等寨敵人十年不敢犯境有招收將劉進勇力絕人
屢以少擊衆并人惡之潛為蠟丸書佯遺道上晉帥趙
贊得之以聞太祖詔謙溥械進闕下謙溥言并人反間
欲我殺之也臣願以血屬保其無他太祖為釋進賜金
帛開寶中召為濟州團練使會邊將失律復詔還莅隰

州其後以疾至京卒年六十二子允正允則謙浦慷慨
重然諾所賜優厚皆分遺將士故為其所用者莫不盡力
允正字修已頗讀書居官嚴毅多行殺戮官至河州團
練使卒允正常質其居太宗召謂曰汝父二十年守邊
止有一第何故質之曰妹適陳王貧無以具禮耳詔為
償值而還其第縉紳多賦詩以美之

允則字垂範以父任為濟州衙內指揮使謙溥卒任左
班殿直少以才略聞太平興國七年初置靜戎軍權場

特命允則領之自是屢奉使諸路知潭滄雄鎮潞州而
雄州嘗再莅焉除寧州防禦使卒年七十六子中和中吉
中謹初允則在閤門凡下諸路宣敕真宗必付允則視
審而後行京師諸河水門及鄭州水碓皆淳化中允則
所開治湖南民歲輸絹謂之地稅絹又屋每間出絹一
丈三尺謂之屋稅絹始戶給一牛歲輸米四斛牛斃猶
輸謂之枯骨稅皆馬氏暴斂之餘允則治潭州悉奏除
之湖湘山田民不耕墾允則下令給諸軍芻皆輸粟藁

由是山田遂無遺利潭州舊分兵戍邵州允則謂蠻不
擾而益戍兵是長邊患也亦遂奏罷初至滄州葺營壘
多開井泉言者以為擾未幾契丹圍城近郊老幼皆入
城保而水不乏又斲冰代砲積成深泥敵兵遂解真宗
召而語之曰頃有言卿擾民者及敵至始見利也王超
之敗人心危動允則勸使衰經向師而哭以解衆忿仍
趨整師以進真宗聞而降手詔褒勵雄州榷場禁通異
物邏者獲眠玉帶及婦人首飾交易者允則縱之曰此

以我無用易彼有用也周世宗始以瓦橋闕置州居民
惟結茆允則教以陶公私營造皆易為瓦甍矣又合外
舊甍城與大城為一始創關城焉濬濠起月隄環以溝
塹增廣閭承翰所修屯田架橋引水作梁構亭榭列堤
道以通安肅廣信順安軍所以設險者備矣舊城樓可
望十里以為斥堠允則曰南北通好安用此為命毀之
後乃徙浮圖於北原上所望踰三十里將為新城先建
東嶽祠自以黃金百兩為供器導以鼓吹民間競以金

銀器獻久之密撤去而捕盜移文北界因以護祠為言
興版築城就而敵不知也雄州上元舊不放燈允則結
綵山聚優樂縱民夜遊諜知北人欲觀燈乃率同僚會
城北俄有衣紫胡人至出妓女列侍延之傳舍劇飲而
罷密使縱所乘騾遁去即幽州統軍也後數日間為北
主所誅矣嘗宴兵而甲仗庫火終宴不救後梟問其故
曰兵械警火甚嚴當宴而燔姦人欲以計見動若捨宴
救火其誰不他窺測也真宗善之景德以後國信往還

儀制及所費用皆其所裁定智識開敏處事審當其方
略施設雖遊觀亭傳莫不有所寓也

賀惟忠沂州人初隸周世宗藩邸召補供奉官不辭而
去世宗怒及即位不復用宋興擢儀鸞副使知易州以
功就遷本州刺史知書曉兵法撫士卒能得其心乘障
用兵所向無敵在易州十餘年契丹不敢南牧及卒以
其子昭慶為供奉官

姚內斌平州人少事北主周顯德末世宗北征太祖將

兵至瓦橋關內斌為關使開門請降世宗以為汝州刺史乾德中改命慶州十餘年戎不敢犯塞稱之為虎卒年六十四

董遵誨范陽人有方畧善御夷狄守通遠軍十餘年蕃漢悅附

王彥昇字光烈本蜀人後唐平蜀徙居洛陽顯德末以散員指揮使從太祖北伐至陳橋以軍中擁戴而還彥昇先入殺韓通太祖怒之出為唐州刺史久之徙原州

防禦使卒年五十八彥昇殘忍在原州戎人有犯漢法者會賓客則引而前以手梓其耳對衆大嚼沃以卮酒前後敵中有無耳者皆彥昇所殘也故並塞數年戎人畏之無犬吠之警

趙贊字元輔幽薊人父延壽尚後唐明宗公主五代史有傳贊七歲應神童明宗賜童子及第附長興春榜延壽守上黨并其父德鈞皆陷契丹贊獨與母在洛陽晉祖由契丹援立命贊奉母北歸贊在晉末受北朝偽河中節

度使北主歸得留鎮河中漢祖起晉陽贊因勸進改京
兆尹周世宗征淮南留贊與諸將圍壽陽諸將皆敗贊
獨有功及移軍尺椽片瓦無棄者淮南平贊功居多乾
德初授晉州刺史兼建隆軍節度使太宗即位來朝而
卒贈侍中贊喜讀書接人以禮才長於御衆所至吏民
畏服

李漢超字顯忠雲中人仕周至殿前都虞候宋興累遷
至齊州防禦使關南兵馬都監有善政齊人愛之詣闕

求立碑太祖命徐鉉為文賜之刻石太平興國間除觀
察使卒贈忠武軍節度使檢校太傅漢超知人疾苦善
撫士卒死之日軍中皆殞涕初在關南人有訟漢超強
取其女為妾及貸而不償者太祖召而問之曰汝女可
適何人曰農家也又問漢超未至關南契丹何如曰歲
苦侵暴曰今復爾耶曰否曰漢超朕之貴臣也為其妾
不猶愈於農婦乎使漢超不守關南尚能保汝家之所
有乎責而遣之密使諭漢超曰亟還其女并所負朕姑

賈汝慎勿復為也。不足於用，何不以告朕耶？齊、隸監酒之利數倍他郡，何繼筠在隸，漢超、荏、齊皆得用以養士，而朝廷不計其所費？

楊美字仲和，太原人。仕周至刺史。建隆初，為北海軍使。乾德初，征蜀，召委以軍政，民詣公車乞留者數百人，詔遣還不從。管其為首者始去，其治尚簡易，民愛之。如此，荏軍亦為衆所服。任氣好施，俸賜悉以賙親舊。官至節度使，死之日，家無餘財。郭廷謂字信臣，其先彭城人。唐末居淮甸，父全義為江

南觀察使廷謂初有氣槩頗讀書父卒監濠州兵周世宗征淮破紫金山之衆至渦口夾築壘為浮梁扼濠壽廷謂率水軍犯之世宗又命武行德率師屯定遠以逼濠州廷謂襲敗行德李景遂擢廷謂本州團練使及世宗攻濠勢已危蹙累詔招諭廷謂曰世受江南大恩不敢輕去就願聽稟命金陵世宗許之及使還廷謂望金陵大慟再拜然後以城降世宗曰江南諸將惟卿斷渦口橋破定遠寨足以報李景祿矣濠上使李景自守亦

何能為乃授以亳州防禦使復帥濠兵攻降天長在亳有政績乾德初改絳州防禦使蜀平以觀察使知梓州民便其政卒年五十四廷謂有士君子之風

李懷忠涿郡人始事太祖為牙校以功累擢至大同軍節度使太祖洛京郊祀愛其山川形勢有遷都意莫敢言者懷忠乘間曰汴都歲漕江淮米四五百萬斛贍軍數十萬計帑藏重兵在焉陛下遽欲都此誰與共處耶上悟急還京懷忠太平興國中卒

郭進深州人少傭作有膂力多結豪俠飲博人有欲殺之者富人婦竺氏陰告之乃之晉陽漢祖留帳下北寇屠安陽漢祖遣進拒戰敵敗走以功除刺史及德光盜據汴京復北歸進請以奇兵間道入洺州因定河北諸郡仕周改登州刺史郡多寇盜進悉為翦除吏民願紀其事詔近臣撰文賜之改刺衛州河朔盜匿及郡山間者稍衆間出攘奪久不能滅進往攻勦絕民以安居改洺州團練使郡人誦其善政建隆初遷防禦使久之除

雲州觀察使訪竺氏已死得其女撫養以適富民時劉繼元據并門未下以進兼西山巡檢二十年不易其任進聽訟善以鉤距得其情軍政嚴肅戰無不克太祖遣戍西山必戒之曰汝謹奉法我猶赦汝郭進殺汝矣以郡之租賦聽其養士卒有司不復會其出入其待之如此太宗征太原命進控石嶺關北兵來援晉進擊敗之并人氣喪既而為田欽祚所誣進剛忿不能辨乃自經而死欽祚偽以暴疾聞上深悼之進喜周人急所至有

遺愛在洺州植柳種荷芰遍城中外其後郡民見之有
垂涕者太祖刻五季之弊開億世之業明於知人任將
有術付郭進以邢州李謙溥以隰州俾制太原何繼筠
以滄景賀惟忠以易州李漢超以關南俾控北邊授姚
內斌以慶州董遵誨以通遠軍王彥昇以原州俾禦西
寇不易其任皆十餘年待之以不疑斬之以遠效來朝
賜食殿坐遣之則賜予加等擢何筠以節制必示以懋
功之賞餘不過公邊巡檢欲激其進取之心故二十年

間邊無事者非適然也

武行德太原人少負薪道遇晉祖異其所負命數人力不能舉因留之帳下累擢至寧國軍都虞候開運末北主犯闕行德陷陣中偽請自効因遣送將校數十輩護所取尚方鎧甲還胡中至河陰行德謂衆曰我與若等能為異域鬼耶辭氣慷慨涕泗橫集衆素服其威名皆曰惟命遂攻孟州城走其偽節度使崔延勳悉府庫分諸校而權領州事遣弟行友詣太原勸進漢祖喜因來

河陽依行德行德以兵翼至京師漢有天下授河陽三
城節度使加平章事至周加侍中行河南尹時鹽禁入
城者死有抱關卒捕一鬻蔬嫗至庭行德詰之嫗曰入
城有浮圖取宮中蔬視而不售俄與卒同捕繫鹽非嫗
所有也行德訊得誣狀皆戮之都人畏服以為神明建
隆初改忠武軍節制開府儀同三司進太傅卒

隆平集卷十六

欽定四庫全書

隆平集卷十七

宋 曾鞏 撰

武臣

馬仁瑀魏郡人年十六委質周祖帳下力挽弓二百斤
世宗命衛士習射苑中仁瑀獨挽強百發百中賜錦袍
束帶從世宗親征劉崇王師不利仁瑀謂衆曰主辱臣
死因躍馬大呼引弓連斃將卒數十士氣始振崇遂敗

隨世宗征淮南登楚州永寨飛樓距城百步城卒詬罵左右射莫能及召仁瑀至應弦而斃建隆初以佐命功為刺史累擢至朔州觀察使卒年五十

楊鄴或曰繼鄴麟州人少倜儻謂其昆弟他時為將用兵當如鷹逐雉免弱冠事太原劉崇至節度使太宗征太原劉繼元降得鄴甚喜授以大將軍數日遷防禦使知代州北兵攻雁門鄴以數百騎由小徑背擊大破之遷雲州觀察使判代州授詔副潘美北征以王侁劉文裕

護其軍拔雲應寰朔四州時曹彬失律於岐溝詔美護
四州民徙內地既而敵復破寰州鄴謂侁等曰敵勢盛
不可與戰姑密諭雲朔等將先出寰我師次應州敵必
悉衆來拒俾朔州吏民直入石碣谷列强弩千人於谷
口以騎士援於中路則三州之衆萬全矣侁沮之文裕
亦欲鄴赴敵鄴曰此必敗之道也侁曰君侯素號無敵
見敵逗撓豈有他志鄴曰非愛死特殺傷士卒而功不
可立耳即率帳下自石朱路趨朔州將行泣謂美曰鄴

太原一降將上不殺而授以兵柄非縱敵不擊欲圖報萬一也諸君責鄴以避敵當即死矣因指陳家谷口曰君侯於此張步兵强弩以援使鄴轉戰至此失援則無遺類也美與旆陣於谷口自寅至巳旆使人登托邏臺望見敵敗欲爭其功即引兵離谷美不能止乃行二十里聞鄴敗帥兵却走鄴力戰至暮望谷無人撫膺大慟其子延玉死焉帳下兵殆盡猶手刃數十百人因重傷為敵所獲太息曰為姦臣所逼王師敗衄不食三日而

死陣將陷麾下猶餘百人鄴謂曰汝曹各有父母妻子
速去尚有生還報天子者無與我俱死於此皆流涕不
去無一獲還時淄州刺史王貴亦死焉鄴勇而有謀與
下同甘苦代北苦寒未嘗獨設炭為政簡易郡民愛之
天下聞其死皆為之憤歎上尤痛惜之贈節度使北征
之役曹彬岐溝之敗至拒馬河軍民牛馬相踐蹂而死
者甚衆彬貶右驍衛上將軍及鄴陷沒潘美削官三資
時雍熙三年之春夏也是年十二月復命劉廷讓再舉

北伐之兵而全軍陷於君子館廷讓馬斃三易馬始以身免三將繼嗣訟遺瘡痍之卒不滿萬計料鄉兵城守皆不習戰事僅自固而已深祁德州既常不守魏博之北彫弊為甚鄴之子延朗其後緣聖祖諱而改曰延昭以鄴蔭補供奉官鄴及延玉俱死太宗憫之擢延昭崇儀副使咸平二年契丹入寇延昭在遂城城小無備衆心危懼延昭集城中丁壯護守偶大寒命汲水注城外及旦冰堅滑城不可近敵遂解去遷知莫州三年契丹

復寇邊延昭伏銳兵於羊山之西自北掩擊且戰且退
及伏發敵衆敗績獲其明王函首以獻加本州團練使
與楊嗣並命真宗謂宰臣曰嗣及延昭以忠勇自効忌
妬者衆朕力庇之以及於此景德初胡馬南寇延昭領
兵北地破古城多所俘獲會修好乃止徙高陽關副都
部署在屯九年官至英州防禦使卒年五十六詔錄其
子傳永德政文廣有差門客之類亦試藝而官之延昭
於吏事非所長軍中訴譟皆決於小校周正上知而不

責第戒飭小校而已然其智勇善戰沈默寡言平居未嘗問及家事所得俸賜均遺士卒奉已簡質出入騎從如軍校號令嚴明同士卒甘苦寒不披裘暑不張蓋遇敵必身先功成推其下故人樂為用威震異域守邊二十餘年虜情畏服止呼曰楊六郎其卒也河朔之人皆望柩殞泣

王彥超字德昇魏郡人少事魏王繼岌在晉為刺史漢為防禦使周節度使兼侍中建隆初加中書令改授二

鎮封邠國公以太子太師致仕卒年七十三累朝皆有戰功時以為彥超居富貴能知止足

畱福徐州人屢有戰功開寶間以觀察使判雄州凡五年政尚平易民甚便之詣闕借畱詔為立遺愛碑卒贈節度使福既貴諸子欲治第福怒曰我受厚祿矣足以庇汝曹平日以身許國猶未有尺寸効更欲居大第為自安計耶太宗聞而喜之其卒也賜金五十兩市第卹其家

荆罕儒范廷召皆冀州人少為盜王晏字鎮時徐州人
王景字象珍東萊掖人元達沼州人錢守俊濮州人譚
延美大名人世宗既戮何徽樊愛能輩乃擇驍勇士為
將而擢罕儒為團練使建隆初加防禦使晉州鈐轄恃
勇輕敵常懸軍深入擄獲甚衆一夕至京土原劉鈞遣
兵追躡之罕儒方據胡牀饗士錦袍裹甲遂直犯賊鋒
為井人所殺河東久畏其勇欲生致之及死求殺罕儒
者悉誅焉太祖亦深嗟惜罪京土原之不用命者而官

其子加等廷召以勇力應募為軍職在周為殿前右番
指揮使開寶間累遷至鐵騎都虞候太平興國二年契
丹內寇密邇魏博三年春廷召大破之斬首萬餘級追
奔莫州徐寇悉遁未幾卒贈侍中晏開運末為陝西軍
職與都校趙暉侯章謀害耶律德光偽命陝帥劉愿奉
表於漢祖漢祖威聲未振而晏等歸之甚喜即授以節
度使及入汴加平章事周錄其敗劉崇功改武寧節度
使封滕國公因其鄉里以榮之也建隆初以上將軍致

仕奉景自後唐為軍職以功累擢至周為節度使加中書令宋興進封太原郡王卒追封岐王達初事晉邲太宗即位累擢至封州觀察使卒贈節度使守俊事太祖於潛宮屢有戰勞髮後有七黑子如斗在民間時有鄉人目為草中鵲言其勇鷲也積官至潘州防禦使卒年八十二延美仕周至控鶴副指揮使建隆初除指揮使累至觀察使嘗知寧邊軍敵騎驟至城下延美命開門誘之圍城數月開門如故敵卒不敢入而遁久之請老

以上將軍致仕卒年八十三贈節度使罕儒及景皆輕財
好施折節下士有稱於時

高瓊家世燕人父乾徙居亳州蒙城縣瓊少時在外寢
一夕父往視之若見有披金甲而侍其側者父潛異其
事及長而材勇給事晉邸累擢至殿前都指揮使卒年
七十三子繼勲繼忠繼宣繼勲字紹先初補殿直太宗
見而奇之擢寄班祗候咸平初監兵益州王均叛繼勲
引兵與戰賊黨轉鬪至嘉州界敗之復還力攻益州城

而王均夜潰以功遷崇儀使徙綿漢劍門都巡檢悉擒滅均餘黨楊承海等衆徙陝口鈐轄還朝陳用兵方略真宗嘉之除宮苑使并代州鈐轄徙奇嵐軍寇襲草城州繼勲謂軍使賈宗曰敵雖衆而不成列是無主帥也急擊之可成功因設伏要害與接戰寒光嶺伏發斬獲甚衆遷弓箭庫使賜金帶錦袍自是累擢威武保順昭信軍節度使景祐初以年高進見節其拜特許以子扶掖未幾辭管軍遂改鎮建雄知滑州卒年七十八贈太尉

繼勲謙慎有機略善撫士卒故戰常有功子遵度遵範
遵甫遵約遵憲遵讓

黨進朔北戎人幼為天雄節度使杜重威奴重威愛其
淳謹雖長猶令與婢妾雜侍重威敗周祖得之以為鐵
騎都虞候建隆初除刺史以軍功累遷至節度使嘗總
禁旅不識字不記兵籍一日太祖問之舉挺以軍司所
書兵騎戎器數請上自視上益喜其朴直巡徼京師見
珍禽奇獸必放之曰不養父母反養此耶晉邸命親吏

臂鷹雛進急欲放及知乃戒之曰汝謹養視小民傳以
為笑其變詐多此類杜重威之後寒飢進常分俸以給
士大夫或愧焉

呼延贊并人少為鐵騎卒太祖愛其武力擢為軍校屢
以戰功遷至團練使卒贊忠實有勇徧體文以赤心殺
賊字妻子奴婢同爨皆然又刺鏤於鞍勒器用之上出
入有破陣刀降魔杵鐵鞭鐵幘頭兩角有刃皆十餘斤
乘驢馬絳抹額自謂慕尉遲敬德常出刺保州請於上

曰臣服飾奇異願敕郡縣清道太宗笑而不答又請繪形鄭州靈顯王廟願統陰兵滅敵太宗嘗謂近臣曰贊服器詭異朕屢欲誅之既而亮無他志也

崔翰字仲文京兆人少有大志風資偉秀太祖一見奇之以隸麾下即位屢擢刺史太宗莅政進團練使明年講武近郊命翰專金鼓軍容甚整上悅以藩邸時金帶密賜之謂左右曰如崔翰者必不能事晉朝言政出多門故也從征太原流矢中頰猶戰不已上親至其帳撫

之北伐班師次金臺驛大軍南向而潰上令率衛士千餘止之翰請單騎以方略告諭衆遂定戮一人以復命上喜因命翰征定州得以便宜從事沿邊諸軍並從節制軍市租儲聽其專用其冬會李漢超崔彥進破北兵於徐河敵投西山坑谷死者不可勝計俘馘數萬他物又十倍焉擢武泰軍節度使改鎮威德軍至鎮方盜賊充斥翰誘其渠魁諭以禍福乃相率出境又徙高陽召還以疾留京師疾間見上曰臣不願死於家馬革裹屍足

矣上壯其言復命赴所治卒年六十三贈侍中翰沈毅
有謀所至多成功輕財好施死之日家無餘貲

解暉洺州人自後唐隸兵籍凡受詔征伐必身先士卒
臨敵所難者暉處之若甚易金瘡被體幾無完膚建隆
以來屢有攻伐積官至團練使卒年八十

曹翰魏郡人少為郡小吏周祖鎮鄴奇之以隸世宗幕
下世宗鎮澶淵以為牙校及尹開封翰猶在澶淵聞周
祖寢疾不俟召來見世宗密言曰王為冢嗣不侍醫藥

何以副天下之望世宗悟入侍禁中以府事命翰總決
即位補供奉官稍遷樞密承旨世宗征淮南留鎧甲千
數在正陽既而遣降卒八百來京師翰遇於道懼其過
正陽劫兵器叛盡殺之世宗不加責乾德中伐蜀以翰
帥荆襄鑿山開道商旅以濟又詔兼漕運而糧餽不乏
蜀平全師雄擁衆十萬叛翰與曹彬劉廷讓討平之又
軍校呂翰盜據嘉州翰及諸將奪其城謀知賊欲三鼓
復攻城誠擊柝使緩向晨猶二鼓賊衆不集而潰遷蔡

州團練使從征太原會河決詔翰董役指日而訖事後
復有決其績用亦然曹彬平江南翰獨下池陽而煜將
有胡則者以江州拒命翰遂屠其城得公私金帛億萬
計偽言欲致廬山羅漢鑄像於闕下詔從其請因調巨
艦十百同載得以歸朝廷涵容不加詰問錄其功授桂州
觀察使判潁州復從太宗征太原因伐幽州命翰軍東
隅有卒得蟹以獻翰謂諸將曰蟹水物而陸居非其所
也又能行不能進則城不可進拔之象其班師乎卒如

其言師還除威塞軍節度使仍判潁州未行詔翰督役
開河南自雄至莫以通漕運翰遣徒伐巨木於敵地授
五騎以五色旗為斥堠如遇寇則舉白旗之類又起烽
燧於境上敵疑而不敢近塞事遂濟乃歸鎮居數歲汝
陰令孫崇訟其不法鞠得實削奪官爵送登州久之復
千牛衛上將軍卒年六十五贈太尉咸平初賜諡武毅
翰天資殘忍貪冒多智數喜誕妄飲酒至數斗不亂對
上奏事雖數十條皆嘿記不少差

翟守素北海人仕周至刺史宋興累擢商州團練使卒
年七十一自漢策名將六十年以謹厚自持所至稱治
建隆間麟府內屬戎人爭地不決因擾邊民詔守素馳
傳以諭曲直莫不悅服梅山峒蠻人叛又詔守素討平
會陰雨弓弩筋角解弛詰朝將接戰而夜削木為弩遲
明大破其衆焚蕩巢穴賊首包漢湯者與數郡大吏富
民交結守素獲其私書悉焚之以安反側守素建隆之
前已在高列而後進多秉節鉞獨守素二十年不遷而

能恬不為意

折御卿累世邊將奄有麟府之地從祖阮父德辰皆永安軍節度德辰卒御卿勲為留後開寶九年來朝授泰寧軍節度使未行卒朝廷遂降告敕授御卿閑廐使改為崇儀使知府州以功擢至本州觀察使未幾率兵大敗戎人於子河汭除永安軍節度使自是戎兵不敢深入寇一日虜將韓德臧為李繼遷所誘內侵方御卿被病力疾出戰虜將聞其來不敢進既而疾急母令人召歸

御卿曰世受國恩外寇未滅御卿之罪也臨敵棄士卒而歸耶太夫人勿見念也言訖泣下翌日卒年三十八贈侍中錄其子惟正知留務

侯延廣西河平遙人太子太師益之孫也延廣年十歲父仁矩為德州刺史有敵騎數十入城延廣領數騎馳出牙門射殺其酋領仍斬首數級悉擒其餘黨太祖聞而奇之就賜錦袍金帶仁矩卒擢延廣供奉官河西叛卒劉渥嘯聚寇耀州郡邑皆城守延廣輕兵間道追及

於富平而渥等千餘人傳言謂延廣曰公家世富貴奈何與亡卒爭一旦之命也延廣急挺身與鬪斷渥右臂亡走為兵追獲因大破其衆關右平擢刺史知靈州趙保忠方與繼遷通謀上遣李繼隆問罪以延廣護其軍定夏臺就擢知延州先在靈武戎人悅服護軍康贊元害其功誣奏延廣得敵情恐難制遂以慕容德豐至部不治及繼遷寇靈武乃復授延廣團練使知靈州時戎敵塞道延廣獨引數騎之鎮繼遷畏其威望敵皆避之

至郡未幾卒年五十垂絕猶曰今日雖得死所獨恨無功報國耳

田重進范陽人周顯德中應募為卒隸太祖麾下積戰功至刺史太宗即位累擢除節度使領飛狐路都帥破敵衆獲其驍將大鵬翼并契丹游渤海三千餘人斬首數十級逐北四十里下飛狐靈丘數城以功改鎮彰化軍京兆尹卒年六十九贈侍中太宗在藩邸愛其忠勇嘗遺以酒炙不受使者曰晉王賜何敢拒曰我知有天

子不知晉王何人也太宗益嘉其無私交

盧斌開封人始以筆札給事晉邸太宗即位補殿直雍
熙二年北伐隨軍至岐溝王師之敗曹彬憂之斌請以
千弩斫寨敵遁移軍夾河既克涿州留萬兵令斌守斌
以為深在敵境守之無益彬命斌擁城中老幼南徙易
州彬振旅為敵所乘諸將皆以失律被譴獨斌嘗建議
棄涿州獲免端拱中賊劉涯侯和尚劫興平櫟陽斌為
永興華州巡檢薄南山渡渭水擒滅無遺遷供奉官移


梓遂十二州都巡檢仍許以便宜從事淳化二年賊任
誘寇昌合州三年富順監蠻攻榮州斌皆討平既而草
寇結黨鈔略榮戎資州富順監斌又擊滅之是冬李順
亂斌以兵六百人趨成都斬賊數萬級明年成都陷斌
還梓州賊渠相里貴衆三十萬薄城城中兵止三千斌
感勵士伍為固守之計間出與賊擊刺賊稍卻復集機
石連弩衝車雲梯環城矢石如雨斌與州將張雄隨機
設備圍閉八十日王繼恩援兵始至斌開門迎勞王師

賊遂潰散斌因勢追斬及納降二萬餘人又達閭間斬獲千計賊平以功除刺史在川峽六年數以孤軍禦強寇功效最著及平梓綿漢州賊黨方代還遷東上閤門使建言閬州北葭萌路可直入利州若焚棧道劍門之路險不足恃也請立寨柵從之卒年五十一斌善料敵不失機會

趙延進澶州人父暉官至太子太師五代史有傳延進以父任累遷至右千牛衛將軍乾德中伐蜀以延進知

襄州漢水壞隄歲損民田為累石岍其患遂絕嘗與孟
詰藥可瓊屯定州遼人擾邊命延進與崔翰李繼隆將
兵禦之仍賜陣圖分兵為八隊俾奉以從事至蒲城虜
全集乘高望之不見其際翰等方按圖布陣相去百步
士衆疑懼延進曰主上期克敵耳敵衆若此而我師星
布其勢懸絕不如合擊之違令而獲罪不猶愈於辱國
乎翰等曰萬一不捷為之奈何曰延進願獨當其責遂
改為三陣三戰敵衆大潰以功遷右屯衛大將軍知鎮

州民請闕借留許一年改知揚州徙并代州鈐轄又知
相州



隆平集卷十七

欽定四庫全書

史部

隆平集

卷十八至二十

詳校官編修臣李潢

編修臣裴謙覆勘

總校官檢討臣何思鈞

校對官學正臣翁樹棠

謄錄監生臣陳栢

欽定四庫全書

隆平集卷十八

武臣

宋 曾鞏 撰

魏丕字齊物相州人少業儒周世宗鎮澶淵奏為司法
參軍後改授武職太平興國中官至刺史常對太宗願
除臺省官上諭之曰知卿本儒生然兩省不若刺史俸
優也屢求退以左衛大將軍致仕卒年八十二丕好為

歌詩有東亭集六卷常咏山鵲人多誦之

安守忠字信臣父審琦為周節度使封陳王五代史有傳守忠以父任仕周至鞍轡庫使兼刺史乾德中蜀平以守忠任漢州刺史每遣使必戒之曰安守忠能律己汝輩當效其為人至道中擢為節度觀察留後久之卒年六十九贈太尉嘗判雄州方宴賓閣吏言有軍校謀變守忠笑顧坐客曰此輩酒狂耳計未及發而就擒焉人服其能鎮物

楊允恭漢州綿竹人世富於財乾德中王師平蜀允恭
方弱冠率鄉里子弟置寨於清泉為賊所得允恭紹之
曰苟活我當相助賊釋之因厚結賊之子一日賊欲加
害其子密以告遂遁去以策干丁德裕權補為綿竹巡
徼賊平赴闕補殿前承旨太平興國間監兵英州入奏
海賊官不能制又民販海鹽入嶺北者衆請建大庾縣
為軍詔即以大庾縣置南安軍授允恭廣連都巡檢自
是冒禁者少而允恭擒捕海賊殆盡詔獎之自殿直特

遷供奉官改崇班緣江多盜又命領江南催綱捕盜事
至臨江軍擇驛卒具輕舟伺賊所在夜出捕其首者百
數又趣通判躡海寇寇張幕設强弩短礮礮傷允恭肩
血汚衣神色不動密遣善游水者以鐵鉤毀其幕進擊
之斃於水者大半猶生擒百人江路平遷洛苑副使都
大江淮兩浙發運捕賊事賜金帶先是三路轉運各領
其事而上供米歲不過三百萬允恭盡籍三路州卒牙
吏自發運所輸泗州自泗州輸京師歲數遂倍改作坊

使充發運使官置榷場計置買江淮所產茶舊不較精粗久不售而腐者悉焚之允恭具等色年次而給焉遂絕其弊淮南十八郡而九郡行鹽禁允恭以為行法不一抵冒者衆寇盜之生莫不由此請均禁止三司沮其議而允恭力請不已太宗卒從其請又以廬州廬江縣巢縣去州稍遠故多寇盜詔遂建為軍允恭積官至江州刺史卒年五十六賜其子同學究出身李順之亂其兄自縊據綿竹縣而允恭之兄允升弟允元率鄉子弟

擒自榮以獻太宗嘉之授允升本縣令允元什邡縣尉
明年竝召赴闕除允升贊善大夫允元大理評事云

張永德字抱一并州人世以財雄邊父穎在周為防禦
使五代史有傳周祖與穎善以女妻永德既為樞密使
遂表永德授供奉官押班後二年漢命永德押賜昭義
軍節度使常遇生辰禮物遇周祖之外兄弟也周祖時
鎮鄴有密詔付遇永德在潞州聞之因謂遇曰郭侍中
被讒今日之詔得非蒞殺永德邪永德即死竊恐累君

耳遇驚曰何謂也曰姦邪蠹政郭侍中誓清君側願且以永德屬吏少俟其隙君獨不聞郭侍中事邪請具言之明宗起鄴柴翁以女備掖庭至洛失寵出宮過鴻溝遇雨夫人歎曰業緣在此矣乃出匱中物計直千萬以半奉其父母令歸鄴因請曰溝傍傳舍長郭君貴人也願歸之父母大媿終不能奪既歸周祖而謂之曰妾奩中物五百餘萬以資君時不可失也周祖持賂軍司得主書計遂至通顯柴翁者常獨居室人以為司冥事一

日笑不已妻問其故不答翁嗜飲妻醉之以酒乃曰上帝有命郭郎為天子妻頗漏其語遇聞而未甚然之及永德言遂信故止令壯士嚴衛永德未幾周祖使至遇賀且謝曰老夫幾誤大事周祖踐祚除永德左御將軍駙馬都尉從世宗征劉崇高平之戰何徽樊愛能退衄時太祖及永德銜兵各二千人而已太祖曰賊氣方驕公麾下頗能步射可西出陟高而止吾張左掖以應之其勝可必永德亦以為然遂大捷劉崇單騎遁去世宗

謂永德曰樊愛能何歲及徧裨七十餘人吾欲盡按軍
法何如對曰必欲開拓疆宇威加四海安可已也因曰
若非趙某謀出不意則社稷幾殆矣世宗善其言悉誅
愛能輩以徇軍聲始振從世宗征淮南破紫金山十八
砦吳人樓船蔽川永德擇習水者潛鑽其船引兵擊之
溺死者不可勝計以金帶賞鑽船者又以兵絕濠州餉
道世宗手詔褒諭太祖即位加兼侍中改武勝軍節度
使入覲道舊不名待周之舊臣恩禮無與永德比者常

問以下并汾計對曰彼兵雖少而悍加以北虜之援未可遽也姑以間謀離虜心設游兵以擾其穡事俟其困弊乃可圖耳開寶末王師征江南永德以家財具數千舟助軍糧數十萬石優詔獎之鎮穰下十八年頗有治績永德四歲時母馬氏被出嫁安邑人劉祚祚卒永德於南陽公宇為二堂繼母劉居其左馬氏居其右問安視膳皆得其懽馬氏嘗得入謁太宗封為莒國太夫人劉先卒永德為起大第買田以聚其族人母之弟劉再

思亦縻以官爵永德居睢陽比舍有書生卧疾療之獲
痊來謝因曰可市水銀五兩與之即以藥同置鼎中有
頃成白金將別欲求其術書生曰吾不吝此慮損君壽
耳仍告以太祖受命之兆永德遂潛意推奉焉及駐車
下蔡道傍見一僧乃昔書生也召與語復問其訣僧曰
昔語君之貴今不謬矣當保富貴五十年安用此為永
德涉獵經史頗善吟咏禮賢下士故士夫多從之遊卒
於本鎮彰德軍年七十二

柳開字仲塗大名人父承翰仕至監察御史開幼警悟
豪勇父顯德末為南樂令有盜入其家衆不敢動開十
三歲亟取劍逐之盜踰垣開揮刃斷其足二指及就學
講說能究經旨開寶六年登進士第官至如京使知忻
徙滄州未至卒年五十四子涉遷居荆南仕為隍城使
五代學者少尚義理有趙生者得韓愈文數十篇未達
乃攜以示開開一見遂知為文之趣自是屬辭必法韓
柳初名肩愈蓋慕之也著書號東郊野夫又號補亡先

生作二傳以見意時范杲好古學開與齊名謂之柳范
開垂絕語門人張景曰吾十年著一書可行於世景為
名之曰默書辭義稍隱讀難遽曉開尚氣自任不顧小
節所與交者必時之豪俊太宗征河東開從駕督糧適
常潤有小寇遂選開知常州開至治所招誘羣盜以俸
金給賞之又解衣與賊酋置之左右或謂不可開曰彼
失所則盜不爾則吾民也始懼死故假息鋒刃之下今
推以赤心夫豈不懷未半歲境內輯寧雍熙初坐與監

軍忿爭貶上蔡令會王師北伐開部糧至涿州遇米信與北敵戰久不解遣使求降開謂信曰兵法約而請和謀也亟攻必勝信不能決後二日復引兵挑戰諜知求降乃以矢盡及幽州取至故復戰耳開因上書願効死邊鄙太宗憐之除殿中侍御史命使河北又上書願賜步騎數千以滅敵上方擇文臣有武略者即授開崇儀使知寧遠軍契丹貴將白萬德本真定人統緣邊七百餘帳開因其親族往來令說萬德許以蕃鎮俾挈幽州

之衆內屬萬德喜請為期約使未還詔徙知全州州西有溪峒蠻粟氏久為邊患朝廷設峽口香烟等七寨不能禦開至選勇辯吏往說之不踰月攜老幼至州開賦其居業作時鑑一篇刻石戒之遣其酋赴闕授州上佐邊患遂息詔賜開緡錢三十萬會有黥卒訟非辜州下吏削二官頃之上書自陳復還舊秩知環州為理互市之不直者戎落悅附徙知邠州真宗即位遷如京使上書言時政上嘉納之又徙代州葺城壘戰具諸將沮議

因謂其子浩曰吾觀邊星有光雲多從北來寇殆將至
諸將見嫉一旦寇至必危我矣即丐小郡得沂州是秋
寇犯塞

王漢忠字希傑徐州人以材勇給事晉邸太宗踐祚累
擢至觀察使真宗即位進節度使以佐衛上將軍卒年
五十四漢忠有識略軍政嚴整所至無盜賊頗涉儒學
好為歌詩聚書萬卷尊儒士待賓佐有禮輕財好施得
士卒心惟喜矜恃同列多所不悅

慕容德豐字日新節度使延釗之子起家如京使開寶
中監昇州兵澤國富庶使多貪冒德豐獨以修潔稱詔
褒之積官至團練使卒年五十五德豐輕財好施世祿
之厚而家無餘貲

王繼忠開封人父為軍校戍邊而死繼忠因得補殿直
侍真宗在東宮得給事左右即位累擢至雲州觀察使
咸平末契丹入寇繼忠帥定武出戰於望都之北自以
被遇厚思力戰圖報而服飾稍異戎人識之轉鬪累日

援兵不至遂陷敵中初謂已死贈大同軍節度使錄其
子懷敏懷德懷政皆加等景德初敵俾繼忠奏章道意
請修和好朝廷允其請戢兵息民與有力焉自是朝廷
每遣使至契丹必厚賜之繼忠對使臣必泣下常附表
請召還上以誓好既定姑詔諭之彼王待之益厚改其
姓曰耶律名曰顯忠又曰宗信封為吳王

張凝滄州人以親衛隸晉邸及即位授武職咸平初契
丹入寇從大將康保裔合謀伏於瀛州西背腹奮擊凝

陷敵中子昭遠十六歲從行乃單騎馳突所向披靡遇
凝掖之以出見者驚異西鄙有警以凝帥邠寧環慶兼
安撫環州轉運使劉綜懼糧不給問計凝曰當深入因
敵糧可勿慮也自白豹鎮焚族帳掠畜產以歸因襲慶
州蕃族胡家門等破之以其數犯亭徼故乘其不備耳
殘羌遠遁邊境遂安景德初詔北邊豫設奇兵寇來則
分道深入以牽其勢魏散首逗撓諸將皆有言凝獨若
不知或問之曰敵險悍吾輩公言其過使不自安非計

也真宗聞而嘉之久之遷殿前都虞候仍兼寧州防禦使卒年六十二贈節度使凝性資忠義以功名為任善訓士卒所得俸賜均及其下家無餘積昭遠字持正因掖出其父特授左班殿直積官至昭州防禦使卒年五十贈觀察使子克諧克己克忠克從天禧初閤門副使闕樞密院方奏擬人真宗曰朕已有人張昭遠知邊略曹儀習朝廷儀制可用也二人遂竝命焉昭遠所至有政績

上官正開封人少舉三傳為鄜州攝官雍熙中授殿前承旨屢因鞠獄遷至作坊使蜀賊李順之亂正監兵劍門關出兵擊破其黨斬馘殆盡方朝廷以棧道為憂正孤軍破數萬衆其勢遂沮賞功授六宅使劍門刺史順既誅餘黨匿山澤間正推恩信招來之加峰州團練使代王繼恩為西川招安使至道末叛卒劉旰陷邛漢州又詔正討平之累擢洺州防禦使以環衛官分司卒年七十五正不畏強禦而性頗急暴多詬辱官吏太宗常

手札戒之

周審玉開封人周顯德中以父蔭補殿直建隆至雍熙擢為作坊使契丹入寇潘美在定武審玉監軍先鋒劉緒陷賊審玉躍馬趨擊拔緒而還勇冠三軍常知鳳翔府有僧乘傳而西以市木為名威動郡邑審玉按詰盡得其姦狀送闕下時稱審玉非特有武亦通吏術以左千牛衛大將軍致仕卒年七十四

田紹斌少為驍武副校建隆初隸崔彥進麾下討李筠

從李重進平荆湖嶺表又從劉廷讓擊全師雄餘黨從曹彬征江南皆有功太祖伐河東契丹援入於百并紹斌與何繼筠奪賊旗鼓而逐之太平興國初除江州刺史詔討梅山峒蠻斬馘萬餘生擒二萬人邊境遂寧曹彬之出代州也紹斌為先鋒每戰必勝召見便殿面授溪州團練使加冀州防禦使城清遠軍進會州觀察使為靈州副帥部賜糧金帛赴靈武清遠軍者數十趙繼遷數遣萬騎劫之紹斌必出陣大呼賊聞其名皆潰去一

日白守榮馬昭忠護軍儲紹斌自靈武以兵援之數遇敵數勝而守榮昭忠棄輜重與賊戰敗紹斌為擊走賊護糧以行詔褒之俾副李繼隆帥環慶繼隆誣以守榮昭忠落浦河之敗紹斌不救有異志貶率府副率真宗即位復萊州團練使帥延慶有野雞蕃族數寇邊紹斌召其酋豪使斷臂截耳以誓遂不復侵犯紹斌常面斥劉隱及轉運使宋太初事二人銜之歸朝言其過召赴闕誣獲辨命為鎮定先鋒隸傳潛潛屯中山虜至不出

戰石普楊嗣渡嚴浮河頗失利獨紹斌擒獲稍衆復觀
察使及潛下吏亦同被鞠復貶率府副率後累敘復左
領軍衛將軍康州團練使卒紹斌長於兵頗知戰法惟
暴戾無檢好凌犯人屢以誣被黜而不自悔也

李重貴河陽人常給事晉邸及即位累擢至衛州團練
使淳化中遣將五路討賊遷重貴帥麟府得對因言賊
居沙磧逐水草無定止聞兵勢盛則遠遁矣追之或糧
不能繼欲守又彼無堅壘若未能平賊將何顏以見陛

下也太宗雖善其言以師期既定強遣之卒無功而還
咸平三年戎人入寇范廷召戰退康保裔陷賊獨重責
與張凝力戰卻賊全軍以歸凝議上功狀重貴曰大將
陷歿我輩計功是誠何心真宗聞而嘉歎特加階邑以
疾求致仕授左羽林大將軍卒年五十九

石保吉字祐之中書令守信之子尚太祖第五女延慶
公主自諸將軍擢至節度使景德初同平章事是年契
丹入寇真宗將行幸澶淵先遣保吉與李繼隆為排陣

使對壘以待而敵騎數萬驟至城下保吉不介馬當其
前鋒敵甚畏憚駕至衛南師已告捷及振旅舍爵策勲
特加戶邑大中祥符三年卒贈中書令諡壯武保吉有
武幹歷世將相家積不貲而治生射利所至侵擾為魏
帥葉齊查道皆知名士保吉悉命械頸以督糧運物論
少之先是守信鎮宛丘年五十七而卒保吉繼居是鎮
卒年與之同諡者異之

王中正汀州人賈販往來江淮間咸平元年至南康軍

逆旅遇異人自言趙姓久之又見於茅山命求鉛盡遇
火成金謂中正曰當授以法從及歷陽始得之且俾辦
草木藥品而授以小環神劍及密緘之書戒以勿泄中
正亟欲獻於上為有司所抑還至上饒佯狂黥竄嶺外
未幾逋匿京城樞密承旨謝德權嘗為嶺南官知中正
化銀術為奏因得脫軍籍內臣劉承規又以其名聞初
名捷為更曰中正賜對特授許州叅軍承規於皇城公
廨居之凡入市必有人與之語承規詰之不能隱曰即

授法者也承規為新堂以祈靈景德四年五月十三日
遂降於堂紗幘間服青衣具冠劍自是屢降惟中正喻
其旨或其侍童偶語始知乃司命真君也明年天書降
改元大中祥符東封畢加真君號曰九天司命天尊五
年天尊臨降宮庭上號曰聖祖即改皇城新堂曰元符
觀承規私第曰東宅所賜中正通濟坊曰南宅並為聖
祖降憩之所中正累遷加致仕積官至右神武大將軍
唐州團練使大中祥符九年中正被疾見聖祖謂之曰

慎密類汝者少即塑形景靈宮為吾輔勿憂也卒年五十五其妻施氏封吳郡夫人諸子皆授殿直中正初得神術雖貧苦不以勢利趨告於人及享祿賜所化黃白惟施貧奉道釋而已朝廷舉大禮及營繕必達靈命以藥金銀為獻中正復自以所成者助經費上為制靈遇贊紀其事云

石普其先幽州人後徙居太原父通給事晉邸普方十歲亦留邸中以信謹見親太平興國中補寄班祇候遷

供奉官屢以戰功擢至西河節度使知許州大中祥符
中上言九月下旬日食者三又言商賈自秦州來言喃
厮羅欲酬殺曹瑋請以普所獻陣圖付瑋當決必勝帝
謂普妄言樞密使王欽若因言普以邊事動朝廷帝怒
命侍御史知雜呂夷簡劾之獄具集百官叅驗九月下
旬日不食普引伏私藏天文法當死官節度使當議貴
除名貶賀州改率府副率房州安置後稍復至右武衛
大將軍卒年七十五子仲卿仲武仲舒仲文普有膽略

開敵所在即馳赴親冒矢石前後戰未嘗少却通兵書
及陰陽六甲星厯推步之術太宗常令善工製金帶普
帶御器械輒面求解以賜之後雖謫廢當太宗忌日必
舉族詣佛寺齋薦歲以為常淳化中督兵捕永興賊邢
素馳賈禿指百人至則擒之李順之亂為西川行營先
鋒與韓守英馬知節合擊遂斬順因馳驛面陳蜀亂之
由賦斂急迫請一切蠲其租賦太宗許之即日還蜀揭
榜宣諭莫不感悅咸平二年軍盜王均據益州叛又命

為川峽路招安巡檢使雷有終攻城均走普追躡至富順監敗之均自殺獲首以獻餘黨悉平明年契丹寇邊普為保州鈐轄北面行營管神策先鋒殺敵騎於炎涼城又敗之於長城為莫州總管建言軍中號令遣人馳告慮為奸詐所誤真宗為制傳令牌又獻禦戎圖掘塹設險以陷敵馬景德初王繼忠為契丹請和以書遺普普為達於上其後因請罷天下醢設歲可省緡錢十餘萬貫以贍國用遂忤上意

曹克明其先太原人祖為雅州刺史因居百丈縣有賊攻百丈父遠遇害克明尚幼有妾匿之葦薄中得脫既長喜兵法善騎射從父光實領夏州都巡檢破李繼遷繼遷偽降設伏光實赴而歿於葭蘆州克明為衙內虞候從行祕不發哀使人傳光實命回兵銀州乃與其僕潛入敵中獲光實屍還葬京師蜀人於法不許還其鄉克明以母老趨道以歸淳化五年李順反購克明欲用之乃攜老母遁山谷間及賊陷雅州克明乃集潰兵得

七千人又募丁壯三千遂復名山火井夾江等九縣立
七寨於嘉眉邛州界分兵以邀擊賊因復雅州太宗令
總管王繼恩齎敕獎諭擢西頭供奉官監兵黎州以餘
賊未寧徙權雅州駐泊巡檢至道元年峽路潰兵鄧紹
等攻雅州克明又討平之積官至西上閤門使知鼎州卒
年七十二子元賓元舉景德中溪峒蠻入寇以克明知
邕州遺書三十六峒酋長諭以朝廷恩信悉來赴承天
節會遺以篋衣咸感泣而去獨洪峒恃險不至克明說左

右兩江防遏使黃仲盈領兵攻之斬其首領梟首於市
既而宜州澄海軍校陳進反會鬱江暴漲州城摧克明
伐木造船為虛城水上以備守禦仍募溪峒兵趨象州
賊遂南去巡撫使曹利用召克明會兵至貴州遇賊斬
首四百餘級利用專其功克明亦不自言徙都大提舉
江淮兩浙捉賊獲賊必釋其罪予以私錢使返捕索其
黨所獲千餘人知江寧府張詠以其事聞賜錢四十萬
撫水州蠻叛以克明為宜容等十州巡撫使兼安撫蠻

首乞招安不許與中人楊守珍領兵深入蠻多伏弩窮
谷間而登道險絕克明意士卒有退志命後軍伐大木
絕歸路克明踰月纔至撫水州知州蒙承貴等出降克
明謂曰汝三十年為邊患止謂官軍不能至耳天子好
生不欲絕汝類姑許自新皆伏拜感激泣命飲血為誓
勒銘奴山而還於是蠻人願內徙者七百餘人散之湖
南諸州居焉奏請改撫水州曰安化州分以為上中下
三州皆蒙氏為守有區廖潘吳四姓居沿龍江捕魚射

生其田有水田其產牛馬豕彘其植麻苧桑柘其兵器
木弩標槍環刀藥箭傍牌其語惟懷遠人能釋之克明
初至蠻酋獻藥一器曰溪峒藥箭中人可以此解克明
曰何以驗之曰請試以雞犬克明曰當試以人乃用箭
刺酋股飲之藥而死羣蠻股慄安化既平徙知桂州始
置溪峒司而兼領之又奏以廣南兩路土軍竝為忠敢
嶺外民居結茆而已雖嚴火禁不能弭患克明激水以
入城夾道分流以為之備又命北軍教以陶埴民始為

瓦舍自是其患遂平

李繼宣開封人乾德中以材武補殿直年纔十七命捕虎峽州凡殺二十餘生擒二虎一豹以獻遂授以邊任所至有戰功常追北寇於新城斬其賀恩相公監兵高陽率兵入敵境燒聚落獲生口以歸時敵方寇瀛鎮間聞之遂引還初繼宣承受定州路奏事已嘗入北境殺獲甚衆又從崔彥進曹彬李繼隆米信田重進與契丹戰未嘗不捷至是敵畏之惟任鎮州鈐轄而主帥傅潛

怯懦有警請行皆為所抑及與高瓊同主軍事遂逐敵
衆越界河嘗與秦翰楊嗣楊延昭張斌遇賊於威虜軍
臨陣馬中矢凡三易之嗣輩皆引去獨繼宣整所部接
戰薄暮至營所詔稱獎之積官至四方館使康州刺史
卒年六十四

荆嗣河南人少應募為控鶴卒乾德中李繼勲討河東
擇勇敢百人開道擣洛陽寨嗣請行斬五十餘級賊遁
河賊將楊鄴退保城嗣與衆進焚南門奪其羊馬城賊

夜薄寨繼選五百人嗣為其冠及旦斬馘殆盡太宗親
征巡師嗣登城手刃數賊股貫雙箭又中手礮折二齒
太宗亟召賜袍帶常從崔翰征幽州從袁繼忠田欽祚
成三义口從田重進譚延美討賊於飛狐口戰無不克
賊嘗夜圍重進寨重進問計於嗣嗣曰所領不過五百
人彼衆踰二萬計請問道見延美延美曰賊勢如何可
解也嗣曰願得數百人延美與之即依山布陣以三百
人執白旗於道隅獨率所部趨敵敵見其疾馳而旗幟

稍盛疑大軍至遂遁去嗣之用兵凡一百五十餘戰未
嘗無功亦未常自伐也積官至虢州防禦使卒垂涕謂
其子曰累世為將者其後不昌汝輩惟益修謹乃免於
患子信仁貴

隆平集卷十八